

Արշալոյսը, իրաւ, սկսել էր շառագունել. մենք առանց նկատելու անցուցել էինք ամբողջ գիշերը: Բայց Ասլանի մեզ հեռացնելու պատճառը ոչ այնքան լոյսի ծագելն էր, որքան այն, որ նա վախում էր, չլինի թէ մենք լսելնք պառաւ կախարդի բերնից մի անզգոյշ խօսք, որը կը մերկացնէր այն գաղտնիքը, թէ ինչո՞ւ պառաւը իր փոքրիկ Յիւրբիի հետ միշտ անբաժան էին Կարօյից եւ նրա ընկերներից, եւ կամ այն ի՞նչ «ամբողջային աղջիկ» էր, որ պառաւ կախարդի երեւակայութեան մշտական ցնորքն էր դարձել, որպէս աշխատում էր մեզ հաւատացնել ծածկամիտ Ասլանը...

Մենք ընդունեցինք Ասլանի ասածը եւ պատրաստեցինք գնալու դէպի վանքը:

– Քանի որ այստեղ էք, – ասաց նա, – մենք կրկին ու կրկին անգամ պէտք է տեսնենք, եւ հարկաւոր է, որ տեսնենք. մենք խօսելու շատ բաներ ունենք...

Խ. ԱՍԼԱՆԻ ԴԱՏՈՂՈՒԹԻՒՆՆԵՐԸ

Արեգակը արդէն ծագել էր, երբ մենք հասանք վանքի մօտ: Մարօն այնպէս անցաւ ուխտաւորների բանակի միջից, որ ոչ ոք նրան չճանաչեց:

Ես այնուհետեւ մի քանի անգամ տեսնեցայ Ասլանի հետ. նա իր արեղայական կերպարանքով յայտնուում էր ուխտաւորների ամէն շրջաններում: «Այստեղ, ասում էր նա, այս տօնախմբութեան առիթով հաւաքուել են ամէն երկրի հայեր, եւ ես նրանց լաւ ուսումնասիրելու համար փոխեցի կերպարանքս, գիտէի, որ արեղան աւելի մատչելի է նրանց: Այս մարդիկն առանց զգացմունքի, առանց եռանդի չեն. նրանք հասկանում են իրանց դրութեան բոլոր այլանդակութիւնը, բայց դարեւոր հարստահարութիւնների տակ ճնշուելով, մինչ այն աստիճան հոգով եւ մարմնով թուլացած են, որ շատ բնական են գտնում իրանց վիճակի բոլոր դառնութիւնները: Նրանք կարծում են, թէ այլ կերպ լինել կարող չէր, թէ իրանք ստեղծուած են ստրուկներ լինելու համար: Մի ձեռք, մի զօրեղ ձեռք պէտք է, որ դրանց վեր բարձրացնէ ընկած դրութիւնից եւ կանգնեցնէ մարդկային ազատ իրաւունքների վրա»: Այնուհետեւ նա երկար խօսում էր ինձ հետ զանազան առարկաների վրայ, ես մինչեւ այսօր չեմ մոռացել, եւ կարող եմ բոլորը բառ առ բառ գրել: Նա ասում էր.

«Լինում է, այո՛, որ մի ամբողջ ժողովուրդ ինքն է կանգնում ուտքի վրայ, ինքն առանց օտարի ձեռնտոութեան թօթափում էր իր վզից ստրկութեան լուծը: Բայց դա լինում է այն ժամանակ, երբ նա բաւականին հասկացել է, թէ ինչ բան է ազատութիւնը: Եթէ մեր ժողովրդի առաջնորդող մասը նրան այն